



# Kwakkerte - Kroniek

*Leef Kwakkerte, Kwekerkes en Koeleköp*

*VV de Kwakkert veertj aankomendj vastelaoves-  
sezoen zien 5 x 11 jaorig bestaon. Eine mijlpaol  
woeë wae gaer effe bie stil wille staon.*

*De aankomendje waeke kintj gae in 't Heitser  
Blaedje eine trökblik op 55 jaor vastelaovendj  
verwachte, de Kwakkerte-Kroniek.*

## Äöver vreuger .....

De Kwakkert is eigelik al vööl aojer as 5 x 11 jaor. De aodste gegaeves sjtamme oet 1894 wie de ieërste vastelaovesgezèt "de Kwekker" waerdje oetgegaeve as "öfficieel orgaan van de club Vlot op". In det jaor organiseerdje die club ouch al eine optocht, pront wie 't jaor daonao. Neet dudelik is waoróm toen vöör de naam "De Kwekker" is gekaoze.

Bekindj is det vervolges vanaaf 1928 weer eine vastelaovesoptocht door Klein Peries trok. 't Lèste waat wae weite van vöör de aorlog is det Sjeng I Verkoulen in 1938 prins waas.

In de aorlogsjaore waas 't stil aan 't Kwakkerte-fróntj en det zal nemes verbaze. En nao de aorlog wore d'r gein cente vöör pekskes. Plezeer waas d'r des te mieër, zeker toen prins Sjra I Cillekens 't in 1947 bie 't gemeindjebestuur vaerdig kreeg det d'r op zunjig gedanstj mog waere.

Wie 't kwoom is neet dudelik mer de Kwakkert heel nao 1949 op mèt kwake.

Toetdet in 1955 ein paar minse opnuuj de sjouwers ónger de vastelaovendj en ónger de Kwakkert ginge zitte. Det is ouch 't moment woeë-op wae opnuuj zeen beginne te tälle.



In 1957 versjeen d'r weer ein vastelaovesgezèt, 4 pagina's op gezètte-formaat. Oppe ieërste pagina de proklamatie van Prins Sef I mèt ziene liefspröök "Kóm op Klein Peries en zorgtj det de vastelaovendj kloptj wie ei riës!!". Daonaeve eine "wis dich ..." rubriek, get möpkes en ein stökske woeë-in oetgelagd waertj det de gezèt ein kwartje kóstj "ómdet de vereniging ein bietje slecht mèt de contante zitj".

De pagina's 2, 3 en 4 wore in dees ieërste gezèt den ouch herstikke gevöldj mèt advertenties.

Waertj vervolgdj